

## Aymara - Kellkatanaca - Spiritual Warfare Intro Scriptures

Lucas 17:5 Apostolonacapasti Jesusaroyj mayipjjänwa: —Juc'ampi iyawsañ yap't'apjjeta —sasa.

Romanos 10:17 Iyawsañajja ist'apjjatap laycuw utji, cunatejj ist'asqui ucasti Criston yatiyäwipawa.

Lucas 11:1 Mä cutejj Jesusajj mä chekan orascäna, ucat oración lurañ tucuyjjëpanwa, discipulonacapat maynejj juparoyj säna: —Tata, oración lurañay yaticht'apjjeta, cunjämti Juanajj discipulonacaparoyj yatichcäna uqhama —sasa.

1 Timoteo 2:1-4 Nayrakatajj ewjtt'apjjismawa Diosat mayipjjam, oración lurapjjam, Diosarus yuspagarapjjam take jaketa. 2 Diosat mayiñasaraquiw marca apnakerinacataquisa, uqhamarac take autoridadanacataquisa, uqhamat samarañana jan llaquini jacasiñasataqui, Diosar catuyata, uqhamarac takerus suman uñjasaraqui. 3 Aqham lurañaw sumajja, Khespiyiri Diosarusti acajj cusisiyiwa. 4 Jupajj takenin khespiyatäñapwa muni, cunatejj chekäqui uc uñt'apjjañaparaqui.

Zacarías 3:1,2 Ucjjarusti Tatitojj uñacht'ayituwa mä uñjäwinjja Josué sumo sacerdoteru, jupasti sayt'atäscänwa Tatitun angelap nayrakatana. Josué chachan cupëjjapansti supayaraquiw sayt'atäscäna juchañchañataqui. 2 Ucatsti Tatitun angelapajj supayaroyj siwa: “¡Tatitu jumaroyj juchañchpa! Jerusalenaru muniri Tatitu jumaroyj juchañchpa. Aca jakesti mä akquir q'illima nina sanc'at apsutäcaspas uqhamawa” sasa.

Efesios 6:12 Janiw jakenac toketi nuwasctan, jan ucasti alajjpachanacanquiri ñankha ajayunac tokewa, qhitinacatejj aca ch'amac oraken munañampi apnakapqui ucanac contraw nuwastanjja.

Efesios 6:10,11 Jichhajj jilatanaca, ch'amañchasipjjam Tatitumpi, uqhamarac jach'a ch'amapampisa. 11 Jarc'akasipjjam take armanactejj Diosajj churapctam ucanacampi, Supayan c'ari arunacaparuru atipjañataqui.

Efesios 6:13-17 Uqhamajj catjjarupjjam kawkha armanactejj Diosajj churapctam ucanaca, uqhamat jan wali urun atipjapjjañamataqui, uqham lurasinsti juc'amp ch'amani sayt'apjjañamataqui. 14 Ch'amani sayt'asipjjam, cheka cancañampi wac'antata, ucatsti cheka sarnakañampi imt'atäppjaraquim cunjämtejj mä soldadojj armadurampi pechopat imt'asquejj uqhama. 15 Sumancañ arunac parlañatac waquichasipjjam, cunjämtejj mä soldadojj waquichasi zapato uscusisinjja uqhama. 16 Ucatsipansa, iyawsañanacamajj mä escudjamäpan, Supayan akquir flechanacapat jarc'akasiñataqui. 17 Khespiyasiñampisti mä cascompjam p'eker uscusipjjam, Diosan arupsti catjjarupjjaraquim mä espadar uñtata cuntejj Kollan Ajayoyj churapctam uca.

Hebreos 4:12 Diosan arupasti jacasquiwa, jach'a ch'amaniraquiwa. Purapar arini espadat sipansa juc'ampi ariraqui, ucasti almampir ajayumpirojj juc'amp mankhacamaw puri, lup'iwinacsa, chuyman amtäwinacapsa khanstayaraquiwa.

Lucas 4:8 Jesusasti ucjjaroyj Supayaroyj siwa: —Saraket nayat, Supaya; Kellkatanjja siwa: ‘Tatitu Diosamaruw yupaychäta, jupa saparuquiraquiw sirvita’.

Efesios 6:18 Acanacsti oracionampipuni lurapjjam, Diosar mayisina Kollan Ajayu toke. Uc lurañataquisti janc'aquïpjjam, jan pächasisa, uqhamarac take qhitinacatejj Diosancapqui ucanacataquis Diosatjj mayipjjaraquim.

1 Samuel 17:45-47 Davidasti saraqüinwa: —Jumasti espadampi, lanzampi, flechanacampiw nayamp nuwasirejj juttajja ucampis nayajj jumampi nuwasirejj take ch'amani Tatit Diosan sutipjaruw juttjja. Jupasti Israelan ejercitopan Diosapawa, qhitirutejj jumajj arnakcta ucana. 46 Jichhajj Tatitojj jumarojj amparajjaruw catuyitani, ucatsti jichhpachaw jiw't'ayäma, p'ekemsa apakaraquïmawa. Uqhamarac filisteonacan janchipsa alajjpach jamach'inacaruw mank'añanacapataqui churä, pampanquir animalanacaw mank'apjjaraquini. Uqhamatwa take jakenacajj yatipjjani, Israelanija mä Diosajj utjatapa. 47 Take qhitinacatejj jichhajj acancapqui ucanacasti yatipjjaniwa, Tatitojj janiwa espadampiti ni lanzampicha khespiyqui. Aca nuwasïwisti Tatitunquiwa. Juparaquiw jumanacarojj nanacan amparanacajjaru catuyapjjetani —sasaw Davidajj säna.

Lucas 10:17-20 Pakallk tuncanejj wali cusisitaw cuttanjjapjjäna: —¡Tata, ñankha ajayunacampwachaw sutimanijj jaysapjjetu! —sasa. 18 Jesusasti jupanacarojj sänwa: —Jïsa, nayajj uñjaractwa alajjpachata mä Ilijullijur uñtata Supayar jalaktanirjja. 19 Nayaw jumanacarojj ch'amijj churapjjisma catarinacjjaru, uqhamarac alacrananacjjaru tacjjatapjjjañamataqui, uqhamarac uñisirin take ch'amaparu atipt'apjjjañamataqui, janiraquiw cunas camachapcätamti. 20 Ucampis jan cusisipjjamti ñankha ajayunacan jumanacar jaysapjjatam laycojja, jan ucasti cusisipjjam sutinacamajj alajjpachan kellkatätapata —sasa.

2 Corintios 10:3-5 Chekpachansa nanacajj jakenacaquïpjjtwa, ucampis janiw nanacajj acapach jakenacjamaqui ch'amijj tucupcti. 4 Nanacan nuwasïñanacajjataquejj janiw acapach armanacati uscutäquejja, jan ucasti nanacan armanacajjajj pachpa Diosan ch'amapawa, cunanacatejj ch'amanïqui ucanacar tucjañataqui. 5 Uqhampï nanacajj t'unjapjjtjja Dios contra jan wali parlanac utjatapjja, uqhamarac Diosan arunacapajj jan uñt'atäñapataqui jarc'quis uca arunacarusa. Take jakenacan amtatanacapsa Cristoruquiw catuyapjjta, ucanacajj juparu ist'apjjjañapataqui.

2 Timoteo 1:7 Diosajj janiw ajjsarañ ajayu churquistuti, jan ucasti ch'amani, munasiñani, chekappar amuyt'aña ajaywa churistu.

Mateo 12:28,29 Ucampis nayajj uca ñankha ajayunacarojj alisstwa Diosan Ajayupan ch'amapampi, ucasti sañ muni Diosan reinopaw jumanacar purinje. 29 “Amuyapjjamaya, ¿jasaquit mä jakejj mantaspa mä ch'aman jaken utaparojja? ¿Jan ucajj waquisicha nayrakata utaniru wali chinuntaña, ucat take cunatejj jupan utjqui uc apasjjañataquejja?

Efesios 1:13 Cunapachatejj jumanacajj Tatitun khespiyasiñ arunacap ist'apjjta ucqhajja, Cristorojj iyawsapjjtawa, juparuw mayachasjjapjjaractajja uqhamarac Diosanquirinacjamajj Kollan Ajayumpi sellatäjjapjjaractawa cawquërtejj jupajj qhitaniñatac arsuwaycäna ucampi.

Hechos 19:6 Cunapachatejj Pablojj amparapamp jupanacjjar lokjjati ucqhaw Kollan Ajayojj jupanacjjar jutäna. Ucatsti jupanacajj jan uñt'at arunacwa parlapjjäna, Diosan arunacapsa yatiyapjjaraquïna.

Marcos 16:15-18 Ucjjarusti Jesusajj jupanacarojj saraqüinwa: —Take acapachar sarapjjam take jakenacar khespiyasiñ arunac yatiyiri. 16 Qhititejj iyawscani, bautisascaraquinejja, ucajj khespiyatäniwa, jan iyawsiristi, juchañchatäniwa. 17 Aca chimpunacaraquiw iyawsirinac taypinjj utjani: Sutejjanwa ñankha ajayunacjja alissupjjani; machak parlanac parlapjjaraquini; 18 amparanacaparusti catarinac wayjjarupjjani, venenonac umantasasa janiraquiw camachatäpcanisa. Usutanacarusti c'umaraptayapjjaraquiniwa, amparanacapamp lokjjatasa —sasa.

1 Juan 1:9 Jiwasatejj juchanacas arsusiñänejja, jupajj chekawa, asquiraquiw juchanacas perdonañataqui, uqhamarac take jan walinacata k'omachañataquisa.

Éxodo 20:5 Janiwa uca diosanac nayrakatan alt'as'itati, janiraquiw yupaychätasa, naya sapaqu'itwa jumana Tatitu Diosamajja, janiw muncti yakhanacampipjjañama, nayaraquiw mutuyaracta awquinacan juchanacapatsa, uqhamarac cunapachatejj nayar uñisipquitu ucqhajja wawanacarusa, allchhinacarusa, allchhinacan wawanacaparusa.

Salmos 109:17 Ñankhachañ munir'itap laycojj ñankhachatäpan; asquinac jan munir'itap laycojj asquejj jupat jayancpan.

Jueces 16:16 Dalilajja, Sansón chacharojj sapa horasapuniw uqhama jiscjjäna jan inact'asa. Uqhama ancha jisqhitasti Sansón chachajj jiwañwa munjjäna.

Efesios 4:26 Colerasisinjja jan juch lurapjjamti, uca colerasiñanacamajj jan jornalpachäpati.

Romanos 14:12 Uqhamajj take maynipi Diosarojj luräwinacasat cuenta churañänejja.

1 Juan 2:23 Take qhitinacatejj Yokarojj jan uñt'iri tucujja, Awquirojj jan uñt'iriw tucuraqui; ucampis cawqu'iritejj Yokaru catokqui ucajja, Awquirojj catokaraquiw.

Juan 14:6 Jesusajj saraqüinwa: —Nayätwa thaquejja, chekasa, jacañasa. Naya tokequiw Awquin ucar puriñajj utji.

Mateo 11:28-30 Nayar jutapjjam take karjatanaca jatjatanaca, nayaw samarayapjjäma. 29 Nayan yugojjä apapjjam, ucatsti nayat yatekasipjjaraquita. Nayasti llamp'u chuymani, alt'at chuymaniraqu'itwa, ucatwa almaman samarañapjja jicjjatapjjäta. 30 Nayan yugojjasti jasa apañaquiw, qhumojjasti sinti phisnaquiraquiw.

2 Corintios 6:2 Arunacapansti saraqüiw: “Mä suma asqui horasanwa ist'sma, khespiyasiñ urunwa yanapt'aracsma” sasa. Jichhapí uca asqui horasajja; jichharaquipí uca khespiyasiñ urojja.

Romanos 10:13 Kellkataraquiw: “Take qhititejj Tatitun sutipa art'asqui ucajj khespiyatäniwa.”